

**Kalaallit Nunaanni Piartortut najugaqarfissaannik Naalakkersuisut pilersitsinissaq anguniarlugu suliaqarnissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens Napātôk´, Partii Naleraq)

**Akissuteqaat**

(Peqqissutsimut, Isumaginninnermut Inatsisinillu Atuutsitsinermut Naalakkersuisoq)

**Siullermeerinnineq**

Inatsisartunut ilaasortaq Jens Napātôk´ Partii Nalerameersoq piartortut najugaqarfissaannik pilersitsinissaq pillugu aalajangiiffigisassatut siunnersuuteqarneranut Naalakkersuisut qujaffigaat.

Inuit katsorsarneqarsinnaanatik napparsimasut qajassuutassaammata Naalakkersuisut miserratigissanngilaat. Inuk inuunini kipiartoraangat anniarnaveersarneqarluni paarineqarnissamik, isumassorneqarnissamik toqqissisimanissamillu pisariaqartitsisarpoq. Innuttaasut tamarmik taama inissisimasut angerlarsimaffimmik ilaquttamillu sapinngisamik qanittuaniinnissartik kissaatigisarpaat. Taamaattoqarnera nunani allani piartortunut najugaqarfinnik atuinnermit misilittakkat aamma takutippaat. Matumani qanilaartuunissaq qaginisanillu ilagisaqarnissamik periarfissaqarnissaq aamma pingaaruteqartorujussuuvoq. Nuummi piartortunut najugaqarfimmik pilersitsinikkut tamatuma kissaatigisap eqquutsinnissaanut periarfissaqassanngilaq.

Anniarunnaarsagassaallutik immikkut paarisassanut siniffissanik imaluunniit piartortunut inissanik nuna tamakkerlugu pisariaqartitat siniffissanut marlunnut-sisamanut nalunaarusiami 2015-imi Peqqissutsimut Naalakkersuisoqarfimmit suliarineqartumi amerlassusilerneqarput. Siniffissat ima agguataarneqassasut missingerneqarpoq, Nuummi siniffissat ataaseq-marluk aammalu siniffissat ataaseq-marluk illoqarfiit nunaqarfiillu sinnerinut agguataarlugit. Taamaattumillu Dronning Ingridip Napparsimavissuani piartortunut najugaqarfissamik pilersitsisoqassappat nuna tamakkerlugu anniarunnaarsagassaallutik napparsimasunut iluaqutaanissaa ilimagineqanngilaq, pingaartumillu napparsimasunut Nuummi najugalinnut iluaqutaanissaa ilimagineqarluni. Nuummi piartortunut najugaqarfimmik pilersitsinermi sanaartorerinnarmut 70 millioner kroonit missaat aningaasartuutaassasut naatsorsuutigineqarpoq. Tamatuma saniatigut sulisunut aserfallatsaaliinermullu ingerlaavartumik aningaasartuuteqassaaq. Taamaalilluni piartortunut najugaqarfik annertuumik aningaasaliiffiussaaq innuttaasunut ikitsuaraannarnut naatsorsuussaaq. Tamanna qanorluunniit atuutissaaq piartortunut najugaqarfik nunatsinni illoqarfimmi arlaanni pilersinneqassagaluarpat. Peqqinnissaqarfiup aningaasaqarnikkut maanna sinaakkutaasa iluini aningaasaliinissamut periarfissaqanngilaq.

Tamatuma peqatigisaanik peqqinnissaqarfimmi sulisussarsiortarnermi sulisunillu attassiinnarniarnermi unammilligassaqaqtuarneq pissutigalugu piartortunut najugaqarfissamut sulisussanik immikkut ilinniarsimasunik aalajangersimasumik atorfinitsitsiniarneq ajornakusuusaaq. Taamaattumillu atorfiit taartaasartunik inuttalerneqartarnissaat ingerlaavartumik pisariaqartinneqassappat taama unammilligassaqaqneq taartaasartunut aningaasartuutit amerlinerannik nassataqassaaq.

Nunatsinni siammasissumik nunassittariaaseq pissutigalugu napparsimasut angerlarsimaffimmini imaluunniit peqqinnissaqarfiup immikkoortortaani qaninnerpaami piffissap annerpaartaa atortarpaat. Anniarunnaarsaalluni pingaarnertut suliap ullumikkut peqqissaaveqarfinni, nunap immikkoortuini napparsimmavinni, peqqissaasuni angerlarsimaffimmut orniguttartuni, Dronning Ingridip Napparsimmavissuani kiisalu kommunini utoqqaat illuini ingerlanneqartarpoq. Taamaattumik napparsimasut sumiiffigisaanni anniarunnaarsaalluni pingaarnertut suliap isiginiarneqarnissaa pingaaruteqarnerusoq Naalakkersuisut isumaqarput. Nuna tamakkerlugu napparsimasut aammaanniarunnaarsarneqarnissamik pisariaqartitsisoqarmat Nuummi piartortunut najugaqarfissamik pilersitsinissamut maannangaaq tunngavissaqanngilaq.

Taama oqaaseqarlutik siunnersuut itigartinneqassasoq Naalakkersuisunit inassutigineqarpoq.